


# E LUS DI MUNDU



## BIBANDO PA HESUS

**Versíkulo di Memoria:** *"Sea fiel te na morto i lo Mi dunabo e korona di bida"(Revelashon 2:10).*

Estimado Amigu (a):

Esaki ta nos último estudio huntu den e kurso aki, asina ta, nos ta hasi'e un karta speshal na bo, un kombersashon di kurason pa kurason riba e bibamentu pa Kristu. Lo bo no tin un papel regular di preguntanan pa kontesta, pero nos ke pa bo lesa kada parti di e Ultimo les aki kuidadosamente. E ta hasi nos sinti un poko tristu pa yega na nos último lès den e kurso aki. Tabata un plaser pa nos ku abo a sigui te na final.

Tambe mi ke pidi bo awor aki mes pa hasi tur bo posibel pa enlistá otro di bo amigunan, famia, i konosirnan den e kurso aki. Skirbi nan, òf bishita nan, i pidi nan tuma e bon kurso aki. Kisas otronan por haña e kaminda na Dios, pasobra abo a pidi nan studia e kurso aki. Resa pa Señor yuda bo guia maske ta ún alma na Hesus.

Tin diferente kosnan ku mi kier papia ku bo di dje, promé ku bo risibi bo bunita diploma. Mi ta bai duna bo algun sugerensianan ku lo yuda bo segun bo ta trata di biba bo bida pa Dios, for di awor padilanti.

### ORASHON DIARIO

**1. Bo mester hasi orashon kada dia.** Kada mainta ora bo lanta ariba, bo mester hinka bo rudia banda di bo kama i pidi Señor pa tené bo fiel na dJE durante henter dia. No enfrenta un dia nunca sin ku bo a bai serka Señor promé den orashon. E promé momentunan di kada dia mester wòrdu gastá den orashon. Ta den Su forsa so lo bo alkansá!

Orashon ta djis papia ku Hesus; i E ta gusta pa bo papia ku n'E. Podise bo tin un amigu ku tin un telefon. Si bo no yam'e pa hopi tempu, e amigu ei lo sinti desapuntá; lo el pensa ku bo a lubida riba dje. HESUS ke ta bo amigu stima, bo amigu di mas serka, for di awor padilanti. Yam'e varios biaha riba e telefon di shelu, kua ta orashon. Nunca Hesus ta demasiado okupá pa papia ku bo, E ta pone tur kos un banda pa sinta tende bo, asina, no lubida di resa! Kada anochi,

promé ku bo bai drumi, hinka rudia banda di bo kama,

dun'E danki pa Su kuido durante e dia ku a pasa, pidi'é pordon pa kualkier falta ku bo a hasi, i pidi'E Su kuido segun bo ta drumi. E tin nos bida den Su mannan. Laga nos konfi'E.

Un dia mi yu muhé a puntra: *"Tata, ken ta spièrtá mi kada mainta?"* Ata e kontesta: *"E ta spièrtáMi mainta tras mainta; E ta spièrtá Mi orea pa tende" (Isaias 50:4).*

Algun hende por bisa: *"Pero ta ml mama, òf podisé ta mi kasa ta spièrtá mi tur mainta".* Ah, pero ta Dios ta duná bo e rosea di bida, i E ta kousa bo oreatan pa tende bo mama su stem. Asina, no lubidá di resa.

Nos tin ehempel di profeta Daniel. *"E tabata hinka rudia tres bes pa dia, i hasi orashon, i duna gradisimentu dilanti su Dios, manera e tabata hasi anteriormente". (Daniel 6:10).*

HOPI BIAHA durante dia lo bo kontra ku tentashonnan. No lubidá di resa mesora! Maske bo por rondona dor di hopi hende, bo por hasi un orashon silensioso den bo kurason.

*Hesus ta skucka e orashon di mas swak for di Su yu di mas debil.*

### ILUSTRASHON:

Un lokutor di radio ta hasi un zonido débil den e mikrofòn i lo e wòrdu tende podise 12.000 mia leu. Ora abo ofrese un orashon silensioso na Dios, na unda ku bo ta, ki ora ku ta, E lo tende i yudá bo. Asina, no lubidá di resa!

TIN BIAHA bo por bira desanimá, i tur kos por parse masha skur. Oh, no lubidá di hasi orashon e ora ei! Ta e enemigu ta purba kibra bo. Diskutí bo gran desapuntamentu òf doló di kurason ku Hesus. Lo E tuma un interes tierno den bo kaso, i trese alivio i pas.

PODISE bo por pasa dor di algun enfermedat grandi, òf pèrdè un ser stimá dor di morto. No lubidá di resa! Na e graf di Lazaro: *"Hesus a yora"(Juan 11:35).*



El a bisa Su disipelnan ku E ta mira asta ora un para kai na tera. Asina, hiba bo tristesanan den orashon na Señor. Beibel ta primintí: *"i e orashon hasi den fe lo restorá esun ku ta malu, i Señor lo lant'é, i si el a kometé piká, e lo wòrdú pordoná"* (Santiago 5:15, 16).

**BAI SEMPER SERKA HESUS** den orashon pa yudansa. Podisé un di esnan stimá di bo no a entregá nan kurason na Dios. No lubidá resa pe. Orashon konstante a suavisa hopi kurason duru. Amigu(a), orashon ta bo poder di mas grandi den henter mundu. Ora bo ta resa, bo ta yamando henter shelu pa yudansa. Dios nunca lo bandoná bo; asina, no lubida di resa! Na tur okashon, no lubidá di resa! Promé ku bo sali di kas, promé ku bo hasi kualkier kos, resa. Nunca orashon ta di mas.

Si por si akaso, bo a slep i a hasi algun piká, no bisa: "Oh, no ta nodi pa ml purba mas, mi ta muchu swak". Den bo mes forsa bo no por. Ma *"Tur kos mi por den Kristu ku ta fortalese mi"* (Filipensenan 4:13). Satanas ke pa bo desku-rashá i bai for di Dios. Ma nos no ta bai poné atenshon na dje; e ta un enemigu vensí kaba, ku ta sperando su destrukshon total pronto ora ku Hesus bolbe bèk.

Judas 24 ta bisa: *"Awor na esun ku ta poderoso pa warda boso di trompeká, i pa hasi boso para sin kulpa den e presensia di Su gloria ku gran alegría..."*

1 Juan 2:1 ta bisa: *"Mi yu chikitunan, mi ta skirbi boso e kosnan aki pa boso no hasi piká. I si un hende hasi piká, nos tin un Abogado serka e Tata, ku ta Hesu-Kristu, e hustu"*.

Asina apresiado, Si bo arepentí di bo piká i bo bai serka Hesus, nos Abogado, den orashon i pidi'E pordoná bo pa e piká ei ku bo a hasi, E lo tende i lo kubri e piká ei ku Su sanger, i presenta bo limpi atrobe dilanti e Tata.



*Podisé por parse ku bo orashon no ta subi mas haltu ku plafònt. Por parse manera ningun hende ta skucha, pero Hesus no a lubida riba bo. Pesei, resa sin stòp!!!*

## STUDIA SKRITURANAN SANTU

**2. Bo mester tuma tempu tur dia pa lesa e Skrituranan,** kaminda Dios ta papiando ku nos. Ora bo ta resa, bo ta papia ku Dios, i ora bo studia e Beibel, Dios ta papiando bèk ku bo. No laga e kombersashon ta di un banda so! Drecha bo agenda, pa bo tin tempu tur dia pa studia un pida di Dios Su Palabra Santu. E Skrituranan lo bira mas interesante pa bo segun bo ta bira mas konosí ku ne.

BEIBEL ta Dios Su karta pa bo; E ta kontá bo loke a pasa den pasado, loke ta bai pasa den futuro, i E ta konta bo loke E ta spera di bo. Riba e dia di huisio e Skrituranan

Santu lo ta Dios Su midí pa husga kada bida. Ta bon semper promé ku bo bai lesa i studia e Beibel, baha bo kabes den orashon silensioso, pidi Dios manda Su Spiritu Santu pa kita tur distrakshon, i pa yudá bo kompronde i obedese Dios Su palabra. *Laga e Spiritu Santu ta bo Maestro semper.* Sigui ku e bon kustumber aki, i lo bo ripará ku e momentu aki ku bo pasa huntu ku Dios ta bira kada bes mas dushi i presioso pa bo. Di einan bo ta lanta ku forsa i energia pa enfrentá bo dia.



**No aseptá ningun siñansa religioso si e no ta fundá kompletamente riba e Skrituranan Santu.**

Satanas ta odia pa bo lesa e Beibel. Ma pidi Dios enkargá di dje pa bo, i abo sea sigur di lesa bo Beibel kada dia pa bo bira un Kristian fuerte.

Diakuerso ku profesia di Beibel, e tempu ta bin yega pronto ora ku lo bini den hopi paisnan leinan ku ta bai prohibí pastornan di prediká e berdatnan aki, kua bo tabata studiando for di e Palabra di Dios. Ora e tempu ei yega, ABO mester ta Dios Su mensahero i bosero. For di awe praktiká siña partinan di e Beibel for di bo kabes, ku si mester sosode mes ku nan ta kohe tur Beibel kima, ainda bo tin Dios Su palabranan di speransa i spiertamentu grabá den bo mente, pa bo por tin pa duna na otronan.

## TENE PASENSHI

**3. Tene pasenshi semper.** Esei ta un di e kosnan di mas duru pa hasi. No ta basta pa nos sa kiko Skritura ta siña. Nos mester biba e berdatnan aki dilanti hende den nos bida di tur dia. Manera un hende a bisa: *"Bo bida ta e uniko Beibel ku algun hende lo lesa"*. Den e ultimo dianan aki di historia di mundu, ta mas nesesario ku nunca promé pa nos tin pasenshi. Djis pensa loke algun di e siguidoman di Hesus tabata tin ku pasa den dje tempunan pasa. Lesa lo siguiente: *"Otronan a soportá chèrchè f bòftá, asta soportá bui i prizon. A piedra nan, zag nan na dos i mata nan ku spada. Nan a dualu rònt, bistí na lana di karné i kueru di kabritu. Nan tabata pasa mizeria, keda persigú i maltratá"* (Hebreonan 11:36,37).

Hesus a bisa tambe: *"Felis esnan ku sufri persekushon pa motibu ku nan ta kumpli ku boluntat di Dios; reino di shelu ta pa nan. Felis boso ta ora hende zundra boso, persigú boso i gaña tur sorto di kos malu riba boso pa Mi motibu. Alegrá boso i keda kontentu; den shelu tin un rekompensa grandi pa boso. No ta asina mes nan a trata e profetanán, promé ku boso tempu?"* (Mateo 5:10, 11).

Kisas algun di e kosnan aki por pasa ku bo, ma segun bo ta warda riba regreso di Hesus, sea sigur di biba un bida Kristian kariñoso i ku pasenshi. Rekòrdá loke Skritura ta bisa di Dios Su puebel den Su último iglesia: *"Aki ta e pasenshi di e santunan; di esnan ku ta warda e mandamen-*

*tunan di Dios i tin e fe di Hesus"(Revelashon 14:12).*

No ta basta a bo warda e mandamentunan i kere den Hesus, pero mester tin pasenshi tambe den nos bida diario. Algun hende lo hasi bofón di bo pasobra bo no ta kome tur kos ku nan ta kome; otronan lo papia palabranan ofensivo ku bo pasobra bo no ta hasi tur kos ku nan ta hasi. Djis bisa nan pakiko bo no ta hasi e kosnan ei. I sea sigur pa tin pasenshi semper. No hisa stem, ni rabia. Esei no ta fasil, pero a lo largo di e kaminda, e lo duna fruta pa salbashon di otronan.

Segun bo ta disidi biba bo bida pa Dios, hendenan lo kritika bo hopi. Nan lo trata di kaba ku bo. Lo bo no ta kapas semper pa kontesta tur nan argumentunan riba doktrina di Beibel, pero, bo por BIBA e berdat nan dilanti! Bo bida Kristian kariñoso ta e mihó predikashi ku por wòrdu prediká. E echo ku bo a kaba e kurso aki ku eksito mester wòrdu mustrá no solamente ku bo diploma, pero tambe ariba tur kos, dor di bo bida kambia.

Por sosode ku bo a perde pasenshi i a hasi eror di bisa kosnan ku no ta kariñoso na un persona. Bai bek serka dje i pidr'é pordon. Segun ku e mira ku bo ta determiná pa hasi bon, esaki por yud'é disidí pa Hesus. Pero mihó ainda, laga ku semper bo tin pasenshi!

## SERVISIONAN DI IGLESIA

**4. Bini regularmente** na Sabat Skol i na e servisionan di iglesia. Si tin un iglesia Adventista di Shete Dia serka kaminda bo ta biba, bira un miembro di einan, i asisti regularmente. Den e tera nobo nos tur lo bai Sabat Skol huntu: *"I lo ta di luna nobo pa luna nobo, i di sabbat pa sabbat, ku henter humanidat lo bin pa bùig Mi dilanti, Señor ta bisa"* (Isaias 66:23).

Mientras nos ta riba e tera aki ainda, bo mester forma e bon kustumber di bai regularmente na e servisionan di iglesia. *"I no laga di asistí na nos mes reunionnan, manera tin hende ta hasi. Nos mester kurashá otro, i esei mas tantu ainda, segun boso ta mira dia di Señor ta aserka"* (Hebreonan 10:25).

## KOMPARTI BO FE

**5. Konta otronan di bo fe nobo den Hesus.** Tin miles di hende ku ta deseá pa un konosementu simpel di loke Skrituranan ta siña. Bo mester ta Dios Su testigu i konta otronan di e berdatnan nobo aki. Ku bo ayuda hopi hende por siña e kosnan aki promé ku ta muchu lat, i nan tambe por hasi nan preparashon.

HESUS ta bini pronto. Bo mester hasi tur loke bo por pa konta otro i yuda nan prepará tambe. Hopi hende ku lo no skucha un predikador kisas, lo skucha na bo. Bo ta konta nan den un manera simpel loke Beibel ta siña i segun ku nan ta mira bo biba kuidadosamente pa Hesus, hopi lo disidi pa nan tambe sigui'E henter e kaminda. Keré mi, bo goso lo ta inkomparabel!

## E DIA DI KOSECHA

**6. HESUS ta bini pronto!!!** Ki un goso maravioso lo ta pa topa ku boso tur ku a traha e lesnan aki, i a disidi pa sigui Dios tur e kaminda! Lo mi no bisa bo ayo, pasobra nos

tur *"ke kontra otro aya"*. Mi ke pa bo ta sigur di ta kla kada dia di bo bida pa Su glorioso benida. Mi anhelu ta pa boso kada un ku a gradua den e kurso di Bos di Profesia, kontra ku Hesus kara kara ku alegria na Su benida, i na pas. Mi ta deseá pa nos tur tin un hogar eterno den shelu, pa tur eternidat sin fin. Abo lo ta ayanan, no t'asina?

Ku Señor por bendishoná bo grandemente, ta deseo di bo amigunan di: **E BOS DI SPERANSA**

P.S. : Nos ke pa bo sigui skirbi nos di bes en kuando i tene kontakto ku nos. Ki ora ku nos por ta di algun yudansa pa bo, sea asina bon di laga nos sa esei. I no lubida di resa pa nos!



*"Mi a lucha e bon lucha, mi a terminá e kareda, mi a warda e fe; den futuro ta wardá pa mi e korona di hustisia, kual Señor, e Hues hustu, lo dunami riba e dia ei; i no na ami so, ma tambe na tur esnan ku a stima Su binida" (2 Timoteo 4:7,8).*



## MI PAKTO KU DIOS:

***Aseptando HESUS komo mi Salvador personal,  
i deseando pa sigui'E henter e kaminda, den Su forsa:***

1. Lo mi trata di sigui tur loke mi a siña for di Dios Su Palabra, i lo mi sigui hasi henter e Beibel mi regla di fe, segun mi ta sigui studi'é tur dia. \_\_\_\_\_
2. Lo mi wòrdu batisá i uni ku e iglesia berdadero ku ta warda Sabat. \_\_\_\_\_
3. Lo mi hasi loke mi por pa konta otronan loke mi a siña, asina nan tambe por ta kla pa kontra ku Hesus na Su benida. \_\_\_\_\_
4. Lo mi trata semper pa haña mas tantu hende posibel pa tuma e kurso aki di Beibel. \_\_\_\_\_
5. Lo mi resa regularmente kada mainta i kada atardi. \_\_\_\_\_
6. Lo mi lesa e Beibel tur dia di mi bida. \_\_\_\_\_
7. Lo mi pidi Dios pordon, ki ora ku mi hasi kualke piká. \_\_\_\_\_
8. Si ta un hende mi a ofendé, lo mi pidi'é pordon \_\_\_\_\_
9. Lo mi hasi'é mi kustumber pa no bai ningun lugar, kaminda mi no por hiba Hesus, i di no hasi nada riba kua mi no por pidi Su bendishon. \_\_\_\_\_
10. Ku Su yudansa, lo mi biba fiel na e Dies Mandamentunan, i na e bida i siñansanan di Hesus. Lo mi trata di biba tur dia pa Su pronto benida. \_\_\_\_\_

*Lo bo ke chek kada un di e dies puntonan aki riba ku bo ta deseá di sigui.  
Si bo ke hasi e pakto aki ku Dios, pone bo firma akibou*

\*\*\*\*\*

### MI NOMBER I DIREKSHON:

Nòmber: \_\_\_\_\_ Fam: \_\_\_\_\_

Kaya: \_\_\_\_\_ Number: \_\_\_\_\_ Stat: \_\_\_\_\_

*Debolbé e papel aki pa korekshon na: BOS DI PROFESIA P.O. Box # 300 -- Curacao N.A.*